



CONVENIO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E O COLEXIO OFICIAL DE TRABALLO SOCIAL DE GALICIA PARA A COLABORACIÓN NA EMISIÓN DE INFORMES PERICIAIS

Santiago de Compostela, 11 de setembro de 2017

REUNIDOS

Dunha banda, **Alfonso Rueda Valenzuela**, vicepresidente e conselleiro de Presidencia, Administracións Públicas e Xustiza, actuando en nome e representación da Xunta de Galicia, en virtude do Decreto 148/2016, do 13 de novembro, polo que se nomean os titulares dos departamentos da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa presidencia.

Doutra, **Marta Capeáns Outeiro**, presidenta do Colexio Oficial de Traballo Social de Galicia, actuando no seu nome e representación e de acordo cos seus estatutos.

EXPOÑEN

Primeiro.- O Estatuto de Autonomía de Galicia, aprobado por Lei orgánica 1/1981, do 6 de abril, establece no seu artigo 20.1 que en relación coa Administración de xustiza correspóndelle á Comunidade Autónoma exercer todas as facultades que as leis orgánicas do poder xudicial e do Consello Xeral do Poder Xudicial recoñecen ou atribúen ao Goberno do Estado. Nesta cláusula estatutaria atópase a orixe do traspaso á Comunidade Autónoma de Galicia das funcións que desempeñaba a Administración do Estado en materia de provisión de medios materiais e económicos para o funcionamento da Administración de xustiza.

Segundo. O Real decreto 2166/1994, do 4 de novembro, sobre traspaso de funcións en materia de provisión de medios materiais e económicos para o funcionamento da Administración de xustiza (funcións asumidas a través do Decreto 394/1994, do 29 de decembro), O Real decreto 2397/1996, do 22 de novembro, sobre traspaso de funcións e servizos en materia de medios persoais ao servizo da Administración de xustiza (funcións asumidas a través do Decreto 438/1996, do 20 de decembro), e o Real decreto 233/1998, do 16 de febreiro sobre traspaso das competencias equivalentes relativas ás fiscalías de Galicia e aos institutos de medicamento legal (funcións asumidas a través do Decreto 82/1998, do 5 de marzo), que completan o proceso de transferencia de medios en materia de xustiza á Comunidade Autónoma de Galicia.

Terceiro. O Colexio Oficial de Traballo Social de Galicia é unha corporación de dereito público de carácter representativo do traballo social, con personalidade xurídica propia e plena



capacidade para o cumprimento dos seus fins. De acordo aos seus Estatutos, o Colexio Oficial de Traballo Social de Galicia relacionarase directamente coa Administración da Comunidade Autónoma de Galicia a través da consellería competente en materia de colexios profesionais, no referente aos aspectos institucionais, e a través da/das consellería/s competente/s en relación coa profesión e no referente aos seus contidos. Do mesmo xeito, poderá formalizar convenios ou colaboracións con entidades públicas ou privadas e con colectivos de profesionais a nivel estatal ou internacional dentro do marco da lexislación vixente, incluíndo a prestación de servizos e a súa contratación.

Igualmente, entre os seus fins se atopan colaborar coas administracións públicas no exercicio das súas competencias, nos termos previstos na lexislación vixente e favorecer a promoción profesional e laboral das persoas colexiadas, procurando nichos de emprego, fomentando o emprendemento das persoas colexiadas e procurando as canles de apoio en materia de asesoría ou económico que acorden os órganos de goberno e representación.

Cuarto.- As administracións públicas poden celebrar convenios de colaboración con outras entidades públicas así como con persoas xurídicas suxeitas ao dereito privado ao abeiro do disposto no artigo 4 do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, e mais no Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda do 8 de abril de 1991.

Quinto.- A concesión directa da subvención a través deste convenio efectuarase ao abeiro dos artigos 19.4.c) e 26 da Lei 9/2007, do 13 de xuño, de subvencións de Galicia, e o artigo 40 do Decreto 11/2009, do 8 de xaneiro, polo que se aproba o regulamento da Lei 9/2007, na que se prevé a posibilidade de excepcionar do réxime ordinario de concorrência competitiva en base ao carácter singular da subvención e razóns de interese público, social e humanitario, cal é o caso no que o interese prioritario é poder dar resposta a gran demanda de valoración en materia de familia por parte dos xulgados e tribunais, con especial significación da ligada á xustiza penal (violencia de xénero, credibilidade da testemuña en menores abusados, dano psíquico, imputabilidade, acoso, etc.)

Por todo o exposto, as partes acordan asinar o presente convenio de colaboración en base ás seguintes

CLÁUSULAS

Primeira. Obxecto, beneficiario e condicións do convenio.

O obxecto deste convenio é a colaboración na realización de informes periciais a solicitude dos



órganos xudiciais en Galicia por parte do Colexio Oficial de Traballo Social de Galicia.

Os/as profesionais do traballo social que presten estes servizos deberán ser seleccionados/as entre os/as colexiados/as que cumpran cos requisitos xurídico administrativos para o exercicio profesional e máis cos requisitos previstos pola normativa para poderen actuar como peritos, conforme aos seguintes criterios, pola orde de prioridade en que se relacionan:

- 1.º O desempeño de actividades de similares características
- 2.º A formación e especialización en o ámbito da asistencia pericial forense.

No caso da realización de periciais a solicitude dos órganos xudiciais procederase con arranxo ás seguintes normas:

I. Solicitude.

Os/as profesionais do traballo social exercerán as súas funcións sempre a petición dos xulgados e tribunais, que derivarán a petición directamente ao Colexio Oficial de Traballo Social de Galicia e de acordo coas instrucións concretas que estes indiquen para cada caso, especificando con claridade o obxecto da pericia, e actuarán no ámbito da súa disciplina con plena independencia e baixo criterios estritamente científicos.

Na medida na cal o permita o obxecto da pericia, e en canto sexan aplicables ao traballo social, seguiranse os criterios das guías e protocolos de actuación previstos polo Consello Xeral do Poder Xudicial e similares documentos técnicos

II. Selección de profesionais do traballo social.

Para a selección dos/das profesionais do traballo social que vaian realizar as pericias, o Colexio de Traballadores Sociais elaborarán unha lista específica, distinta á establecida para as Oficinas de Asistencia ás Vítimas

Os/as profesionais do traballo social que concorran ao proceso de selección organizado polo Colexio Oficial de Traballo Social de Galicia deberán cumprir o seguintes requisitos:

- Ser traballador/a social colexiado/a ao corrente do pago das cotas colexiais.
- Non estar a cumprir unha sanción.
- Declaración responsable de non ter incompatibilidades profesionais. A realización de pericias a solicitude dos órganos xudiciais prevista no presente convenio é incompatible con exercer funcións de traballador/a social adscrito á Administración de Xustiza como traballador/a social Forense ou nas Oficinas de Asistencia ás Vítimas dependentes da citada Administración.
- Ter formación específica que acredite coñecemento no marco da peritaxe social e/ou



formar parte das listaxes de peritos sociais da Administración de xustiza.

- Acreditar a emisión dalgún informe pericial, ou de informes sociais dirixidos á Administración de xustiza
- Ter capacidade legal para a emisión de facturas.
- Ter contratada un seguro de responsabilidade civil profesional, a cal se acreditará mediante o pago do último recibo do ano en curso..

III. Listaxes.

Unha vez que o/a profesional do traballo social entre a formar parte da lista de reforzos para a emisión de periciais asinará un compromiso de aceptación das normas de funcionamento da lista, así como do compromiso de actuación. A excepcionalidade na renuncia da pericial será por causas acreditadas e de forza maior. Efectuarase un sorteo para determinar a letra ou o número de colexiado/a pola que se iniciará o funcionamento da lista.

IV. Realización da pericia.

Unha vez asignado/a o/a profesional para a elaboración do informe pericial, o Colexio Oficial de Traballo Social de Galicia contactará por correo electrónico co/a mesmo/a, outorgándolle un prazo máximo de 4 días laborables para que acuda directamente á oficina xudicial que se lle indique, a realizar a aceptación do encargo ante o funcionario correspondente. A aceptación do encargo levará a de todas aquelas actuacións que o órgano ou oficina xudicial requira en relación co informe pericial realizado. A través do órgano xudicial o traballador social realizará a primeira citación do suxeitos obxecto de avaliación, a fin de que quede constancia oficial da mesma.

Todas as actuacións necesarias para a elaboración do informe serán realizadas no despacho profesional, e con medios propios, ou nas instalacións facilitadas polo Colexio de Traballo Social de Galicia, agás aquelas que teñan que ser realizadas en sede xudicial ou nos locais que o órgano xudicial designe.

O prazo máximo para a entrega do informe ao órgano xudicial que o solicitou será de 40 días desde a aceptación do encargo, salvo casos xustificados debidamente acreditados.

Unha vez realizado o informe pericial o traballador social presentará ao órgano xudicial petionario e remitirá copia ao Instituto de Medicina Legal de Galicia.

V. Prezo do informe.

Cada pericia dará lugar a un informe que se abonará cun pagamento máximo único a razón de 400 euros (IVE incluído), que incluírá todos os gastos xerados pola intervención pericial:



- Elaboración, redacción , emisión e entrega do informe
- Desprazamentos
- Aclaracións, ratificacións, asistencias e, en xeral, calquera actuación ante o órgano ou oficina xudicial, incluído o acto de xuízo oral.

A acción obxecto do convenio desenvolverase desde o día da súa sinatura ata o 31 de decembro de 2017, nos lugares e forma establecidos neste apartado e executarase con cargo aos créditos orzamentarios de 2017.

Segunda. Capacidade

Previamente á formalización do presente convenio, o Colexio Oficial de Traballo Social de Galicia presentou ante a Vicepresidencia e Consellería de Presidencia, Administracións Públicas e Xustiza a declaración responsable de non estar incurso en ningunha das prohibicións para a obtención de subvencións contempladas no artigo 10.2 da Lei 9/2007, do 13 de xuño, xeral de subvencións e que poidan impedir a subscripción do presente convenio.

Terceira. Compromisos.

O Colexio Oficial de Traballo Social de Galicia comprométese a prestar a actividade nas condicións establecidas no presente convenio, facilitando as/os traballadoras/es sociais que realicen as periciais.

A prestación de servizos realizada polas/os traballadoras/es sociais obxecto deste convenio, non levará o establecemento dunha relación laboral co Colexio Oficial de Traballo Social de Galicia nin coa Vicepresidencia e Consellería de Presidencia, Administracións Públicas e Xustiza.

O Colexio Oficial de Traballo Social de Galicia comprométese a prestar a colaboración e facilitar canta documentación lle sexa requirida, no exercicio das funcións de control que lle correspondan á Intervención Xeral da Comunidade Autónoma, ao Consello de Contas e ao Tribunal de Contas, así como o sometemento ás actuacións de supervisión e control previstas na Lei 9/2007, do 13 de xuño, de subvencións de Galicia, así como as xerais derivadas da aplicación da normativa de axudas e subvencións.

A Vicepresidencia e Consellería de Presidencia, Administracións Públicas e Xustiza comprométese a abonar ao Colexio Oficial de Traballo Social de Galicia a compensación por un máximo de 105.500,00 €, concedida nos termos e coas condicións establecidas no presente convenio.

Cuarta. Créditos orzamentarios e contías derivados do convenio.

O presente convenio financiarase con cargo aos orzamentos de gastos da Vicepresidencia e



Consellería de Presidencia, Administracións Públicas e Xustiza, con cargo á aplicación orzamentaria 05.22.131A.481.0. A compensación prevista no presente convenio poderá financiar total ou parcialmente os gastos derivados da actividade de asistencia pericial ata un importe máximo de 105.500,00 euros sendo abonada ao Colexio Oficial de Traballo Social de Galicia, aínda que a realización do gasto que se proxecta, queda condicionada á existencia de crédito adecuado e suficiente no momento da adquisición do compromiso do gasto.

A Vicepresidencia e Consellería de Presidencia, Administracións Públicas e Xustiza, nos prazos indicados na cláusula sexta, compensará ao Colexio Oficial de Traballo Social de Galicia pola organización da actividade realizada por unha cantidade máxima de 1.500 euros (IVE incluído).

O Colexio Oficial de Traballo Social de Galicia acreditará a realización das actividades financiadas estendendo certificación do cumprimento da finalidade para a que foi concedida a axuda, na que se detalle os informes periciais efectuados.

Con anterioridade á xustificación da execución da actividade presentárase unha declaración do conxunto de axudas solicitadas –tanto das aprobadas ou concedidas coma das pendentes de resolución– para un mesmo proxecto das distintas administracións públicas competentes ou das súas entidades vinculadas ou dependentes.

Á vista desta documentación, o órgano competente da Vicepresidencia e Consellería de Presidencia, Administracións Públicas e Xustiza expedirá certificación acreditativa do cumprimento dos fins obxecto do convenio.

En todo caso, a cantidade máxima que se obriga a achegar a Vicepresidencia e Consellería de Presidencia, Administracións Públicas e Xustiza reducirase na mesma proporción que represente a cantidade xustificada respecto do orzamento total presentado.

Quinta. Comunicación de subvencións recibidas.

Esta axuda é incompatible coa obtención doutras subvencións, axudas, ingresos ou recursos doutras entidades para a mesma finalidade procedentes de calquera Administración ou entes públicos ou privados, nacionais, da Unión Europea ou de organismos internacionais.

O Colexio de Traballadores Sociais queda obrigado a comunicar á Vicepresidencia e Consellería de Presidencia, Administracións Públicas e Xustiza no momento da súa solicitude e/ou concesión, se conta con algún tipo de axuda ou subvención para os mesmos fins, a súa contía, a entidade ou posible entidade que a concede e a data de solicitude e/ou concesión.

Sexta. Prazos e forma de abono e de xustificación.

A xustificación dos gastos e o seu pagamento realizarase a través de conta xustificativa nos



termos establecidos na Lei 9/2007, do 13 de xuño, de subvencións de Galicia e no do Decreto 11/2009, do 8 de xaneiro, mediante a presentación da seguinte documentación:

- Memoria de actuación, subscrita polo órgano competente da entidade, xustificativa do cumprimento das condicións impostas na concesión da subvención, con indicación das actividades realizadas e da consecución dos obxectivos deste convenio.
- Certificación expedida polo órgano competente do Colexio Oficial de Traballo Social de Galicia, dos gastos realizados, con identificación dos acredores cos seus NIF, os documentos xustificativos, os importes e, de ser o caso, as datas de pagamento.
- Orixinais das facturas ou documentos de valor probatorio equivalente no tráfico xurídico mercantil ou con eficacia administrativa, incorporados na relación á que se fai referencia no parágrafo anterior e a documentación acreditativa do pagamento. Os xustificantes orixinais presentados marcaranse cun selo para os efectos previstos no artigo 49 do Decreto 11/2009, do 8 de xaneiro.
- Cando formen parte da conta xustificativa documentos de gastos que conleven ingresos a conta do IRPF ou cotas por seguros sociais liquidables con posterioridade á data de xustificación, o importe destes ingresos ou cotas considerárase xustificado coa presentación do documento de gasto (factura ou documento equivalente) no que se reflicta o importe da retención ou cotización devengadas na data de xustificación, quedando a entidade obrigada a presentar os documentos acreditativos da súa liquidez nos dez días seguintes ao remate dos prazos legalmente establecidos para o seu ingreso no período voluntario; en todo caso a dita presentación terá como data límite o derradeiro día do mes seguinte ao último trimestre do exercicio da vixencia deste convenio.
- Declaración responsable de non ter solicitado ou percibido outras axudas para a mesma finalidade procedentes das distintas administracións públicas ou doutros entes públicos ou privados, nacionais ou internacionais.
- Declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da comunidade autónoma ou ben as certificacións acreditativas de estar ao día no cumprimento das ditas obrigas.

A xustificación comprenderá os gastos realizados e pagados entre a sinatura do convenio e o 31 de decembro de 2017, e deberá presentarse na Dirección Xeral de Xustiza con data límite 31 de decembro de 2017. Non obstante, de acordo co establecido no artigo 62 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, poderán realizarse pagamentos á conta por un importe de ata o 80% da porcentaxe subvencionada, correspondente aos pagamentos xustificados. Para o seu

aboamento será necesario presentar a documentación antedita, agás a memoria de actuación.

Sétima. Confidencialidade da información e dos resultados.

O Colexio Oficial de Traballo Social de Galicia e mais os/as traballadores sociais que realicen as periciais comprométense a garantir a total confidencialidade dos datos persoais e familiares aos que teñan acceso como consecuencia das actividades realizadas, de acordo co disposto na Lei orgánica 15/1999, do 13 de decembro, de protección de datos de carácter persoal.

Igualmente comprométense a observar o establecido na Lei 39/2015, do 1 de outubro, do procedemento administrativo común das administracións públicas, no que se refire ao acceso limitado aos propios interesados en relación cos documentos que conteñan datos referentes á intimidade das persoas.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal de transparencia e Goberno aberto.

Oitava. Publicidade do convenio

Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.

En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicárase a subscrición deste convenio á Base de Datos Nacional de Subvencións, que opera como sistema nacional de publicidade de subvencións.

Novena. Efectos do convenio.

O presente convenio fornecerá efectos desde o día da súa sinatura ata o 31 de decembro de 2017, salvo que calquera das partes asinantes proceda á súa denuncia expresa cun prazo mínimo de 30 días á data en que se pretenda a súa expiración.

Décima. Comisión de Seguimento.

Crearase unha comisión mixta de seguimento que estará formada por dous representantes da Vicepresidencia e Consellería de Presidencia, Administracións Públicas e Xustiza e dous representantes do Colexio Oficial de Traballo Social de Galicia, e reunirase como mínimo unha



vez ao ano, e facultativamente canto se considere necesario a petición dalgunha das partes.

A comisión rexeráse, en canto ao seu funcionamento, periodicidade das reunións e vinculación dos seus acordos, polo disposto no Capítulo II do Título Preliminar da Lei 40/2015, do 1 de outubro, de Réxime Xurídico do Sector Público, que regula o funcionamento dos órganos colexiados.

Décimo primeira. *Natureza xurídica e resolución de controversias.*

O presente convenio ten natureza xurídico-administrativa, estando excluído do ámbito de aplicación do Texto Refundido da Lei de contratos do sector público aprobado por Real decreto lexislativo 3/2011, do 14 de novembro en virtude do establecido no seu artigo 4.1.d).

O réxime xurídico deste convenio vén determinado polo establecido na Lei 9/2007, do 13 de xuño, de subvencións de Galicia, polo Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, e na Lei 38/2003, do 17 de novembro, xeral de subvencións e demais normas de procedente aplicación.

As cuestións litixiosas xurdidas sobre a interpretación, execución, modificación, resolución e efectos que puidesen derivarse da aplicación do presente convenio deberán liquidarse de mutuo acordo das partes. Se non resultase posible alcanzar devandito acordo, as cuestións litixiosas serán de coñecemento e competencia da orde xurisdiccional Contenciosa-Administrativa, de conformidade co previsto na Lei 29/1998, do 13 de xullo, reguladora da devandita xurisdición.

De conformidade con canto antecede, e en exercicio das atribucións de que son titulares os asinantes, subscriben por duplicado o presente en o lugar e data anteriormente indicados

**Pola Vicepresidencia e Consellería de
Presidencia, Administracións Públicas e
Xustiza**

**Polo Colexio Oficial de Traballo Social de
Galicia**

Alfonso Rueda Valenzuela

Marta Capeáns Outeiro